

Parlamentario mr. Xiomara Maduro (MEP):

No lubida cu Eman a bende e cuero di e baca caba for di 2013

AWOR cu tin bon noticia pa trece pa pueblo riba e deal cu CITGO p'e refinaria, diripiente Minister Presidente, Mike Eman ta na Aruba pa haci anuncio di e noticia positivo aki. Pero ni un dia despues ata informacion ta circula cu ta trece duda si di berdad a yega na un deal cu CITGO.

Con cu sea, pueblo no mester lubida cu Prome Minister Mike Eman a bende e cuero di e baca caba na 2013 na momento cu a sera un MOU entre Gobierno di Aruba, Utilities, GasUnie, Shell y Anthony Veder pa establece na Aruba un transshipment di LNG n'e waf di Valero. Pues pueblo mester tene na cuenta cu Mike Eman su intencion no t'e reapertura di e refinaria, pero mas bien lo kier reemplaza e refinaria pa pone un planta di LNG na su lugar, asina e miembro di fraccion di MEP den Parlamento, mr. Xiomara Maduro a duna di conoce.

E cuero a wordo bendi na 2013

Cu masha tam tam Prome Minister Mike Eman a anuncia na mei 2013, cu pais Aruba y Utilities Aruba N.V. a firma un MOU cu Shell, GasUnie y Anthony Veder pa institui na Aruba un centro di excelencia pa elimina uzo di fuel-oil como combustibel pa produccion di awa y electricidad y reemplaza esaki cu LNG, gas natural likido.

Segun e mandatario a informa e tempo ey, Aruba lo haya un transshipment y un hub pa loke ta trata provision di LNG tanto pa necesidad di Aruba mes como tambe p'e region Caribense.

Prome Minister Eman a indica cu e posibilidad tey cu na Aruba nos por haya un establecimiento caminda ta bay tin un gran cantidad di LNG. Esaki ta sea den un tankero cu ta wordo mara n'e piernan na Valero of un tanki riba tera. Pues cu otro palabra, ya na 2013 Prome Minister Eman a sera deal cu e.o. Shell pa locual ta bira e destino di e tereno y e facilidad di e refinaria.

E cuero di e baca a wordo bendi y pesey Mike Eman desde comienso no tabata interesa pa yuda busca un comprador p'e

refinaria, segun Xiomara Maduro di MEP.

Ta bisto cu e mandatario cu a bende e cuero di e baca caba, tabata mas interesa den ki beneficio e y su hendenan cerca lo por saca di un deal asina hunto cu Shell y GasUnie. Pa no papia mes di e negoshi rond cu lo mester tin cu e desmantelacion y e terenonan di e refinaria cu lo mester cay den man di e famia cu ta hayando casi tur tereno comercial na Aruba.

Dilema di Eman

T'esaki t'e dilema cu Prome Minister Eman a papia di dje na momento cu e negociacionnan cu CITGO a bira mas serio y cu e mandatario mester a core bay reuni na Hulanda cu Minister Koenders. E dilema di Mike Eman no ta entre haya un inyeccion di entrada pa pais Aruba si e refinaria habri of busca un solucion mas duradero pa San Nicolas manera e mandatario a indica. E dilema real t'e deal cu na 2013 ya a wordo sera cu Shell y GasUnie. Ta esaki t'e motibo pa-kico Prome Minister E m a n taba- t a

asina desinteresa den e apertura di e refinaria.

Si ta pa Prome Minister Mike Eman e refinaria no ta habri mas y na su lugar mester bin un planta di LNG conforme e deal sera na 2013.

Mas sinceridad

Como Minister Presidente, Mike Eman mester ta mas sincero cu nos pueblo riba e topico di e refinaria. Prome Minister Eman desde cu a anuncia e MOU cu Shell y GasUnie nunca mas a duna informacion riba esaki.

Ni ora cu nos a haci'e preguntanan oficial riba esaki for di Parlamento. E tempo nos dilanti lo muestra pueblo e intencion real di Prome Minister Eman y lo corda nos pa no lubida cu Eman a bende e cuero di e baca caba desde 2013, ta opinion di Parlamentario di MEP, Xiomara Maduro.

